

Date – 18/12/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. **Larsap Dr. Hari Babu Kambhampati chuan mipuite'n an tana hamthatna awm an hriat chian lehzuala an chhawr tangkai ngei theih nana tan lak a tul thu a sawi.**
2. **Bana Kaih Scheme hnuai tanpuina Loan pekna atan Mizoram Sawrkar leh a Bank thlunzawm ten vawiin khan inremna an ziaak.**
3. **Akashvani Aizawl Director leh Mizoram Cluster Head Pu DR Lalropuia'n Akashvani Aizawl ah Visual Radio System bun thuai tum ani a ti.**
4. **Vawiina Parliament rorel inkhawm chu Union Home Minister Amit Shah-a'n Dr BR Ambedkar-a chanchin a sawi chhuah dan avangin a mumal thei lo.**

<><><>

GOVERNOR

Larsap Dr. Hari Babu Kambhampati chuan mipuite'n an tana hamthatna awm an hriat chian lehzuala an chhawr tangkai ngei theih nan tan lak a tul thu a sawi.

Vawiina Aizawl South-III bialtu MLA Pi Baryl Vanneihisangi'n Centrally Sponsored Scheme, Social Security Scheme leh pawimawh dangte mipuite'n an chhawr tangkai thei dan tur a sawipui naah he thu hi Larsap chuan a sawi a. Larsap chuan amah ngei pawh MLA leh MP a lo nih tawh thin thu leh mipuite rawngbawl sak chu dah pawimawh bera neih a tul thu a sawi a ni.

Aizawl South-III bialtu MLA Pi Baryl Vanneihisangi chuan sawrkar laipui kaltlanga mipuite tana hamthatna duan hriat chian zel a duh thu leh mipuite'n an hlawkpui theih nana tanlak a tum thu Governor hi a hrih a. He hunah hian Social Security Scheme pawimawh tak tak zinga mipuite awlsam taka an inziahlaha an chhawr tangkai theih tur, kum tin cheng 436 thawha engvang pawha thihna a thlena life insurance cheng nuai hnih thleng dawn theihna Pradhan Mantri Jeevan Jyoti Bima Yojana (PMJJBY) leh cheng 20 thawha accident laka life insurance cheng nuai hnih thleng dawn theihna Pradhan Mantri Suraksha Bima Yojana (PMSBY) chungchangte, Mudra Scheme, Solar Rooftop Scheme leh Centrally Sponsored Scheme pawimawh dangte leh hemi kawnga hmalak theih dante an sawidun a ni.

<><><>

MIZORAM SIGNS MoU WITH PARTNER BANKS

Vawiin khan Chief Minister Pu Lalduhoma kaihuaiin Bana Kaih Scheme hnuai Progress Partners te loan pekna atan Mizoram Sorkar leh

Partner Banks State Bank of India, Mizoram Rural Bank Ieh Mizoram Co-operative Apex Bank Ltd. te chuan inremna an ziak.

Vawiina Chief Minister Conference hall a hun hmanah hian Chief Minister hian Chief Minister's Bana Kaih Innovation Challenge an hawng a, Pu Lalduhoma chuan Bana Kaih Scheme chu a taka kalpui ani thei chu lawmawm atih thu sawiin Bank te nena thawh dun ngai a nih angin an thawhpui tur bank te nena inremna an ziak thei chu lawmawm atih thu sawiin hmasawna kawng dikzawh tirtu hmalakna anih ngei a beisei thu a sawi.

Inremna hi Mizoram Sorkar aiawhin Planning & Programme Implementation Department Secretary Pu Lalmalsawma Pachuau in a ziak a, SBI aiawhin Regional Business Office Regional Manager Pu Hubert S.Z Khobung chuan inremna a ziak a, MRB aiawhin Pi Sheryl L Vanchhong, Chairman, MRB chuan a ziak a ziaikin MCAB aiawhin Pu A. Lallungmuana, Chief Executive Officer chuan a ziak a ni.

Chief Minister Pu Lalduhoma'n vawiina Bana Kaih Innovation Challenge a hawn hnuaiah hian intihsiakna hrang hrang a awm dawn a, Sawrkar department hrang hrang ten project thelutin Innovation Challenge intihsiakna neih tur a ni a, District innovation challenge hnuaiah hian Mizorama District zawng zawnga DC te kaihhruaiin Tlawmngai pawl, Local Council leh Village Council bakah Self Help Group leh pawl hrang hrang te a tel theih dawn a, Investor Challenge hnuaiah hian ngaihtuahna thar seng a, thil tha leh tangkai duang chhuak tur te an tel thei dawn a, Mizoram tana danglamna thlen duh tan a tel theih vek a ni. Intihsiakna hrang hrang kalpui dan tur kimchang hi Planning & Programme Implementation Department chuan an la tichhuak leh dawn a ni.

<><><>

SLDC EXCELLENCE AWARD 2024

Power & Electricity Department hnuaia Mizoram State Load Despatch Centre chuan India ram pum huap intihsiakna, Grid India leh Forum of Load Despatcher in a buatsaih, Emerging LDC Category ah 4th LDC Excellence Awards lawmman pakhatna a dawng.

P&E Minister Pu F. Rodingliana chuan he lawmman dawn a nih theihna tur a rim taka thawktu zawng zawng te chungah lawmthu a sawi a, ram leh hnam tan theihtawp chhuah chhunzawm zel turin duhsakna a hlan bawk a ni.

Lawmman hlanna hi National Power System Conference, IIT Indore ah buatsaih niin Power & Electricity Department aiawhin P&E Engineer-in-Chief Pu H. Zonunsanga'n a dawng a. He intihsiaknaah hian India ram pumpui chu Category thum ah then niin, Emerging LDC Category, State leh UT 13 awmnaah lawmman pakhatna 4th LDC Excellence Award 2024 hi Power & Electricity Department Mizoram SLDC hnenah hlan a ni a, P&E Engineer-in-Chief Pu H. Zonunsanga chuan lawmman an la chu lawmawm a tih thu Akashvani a hrilh a ni.

<><><>

AMC

Aizawl Municipal Corporation chuan Pi Saiziki, Republic Vengthlang ram, ITI Veng huamchhunga leivung paih chu ti tawp tura thu pe in Chite luia leivung lut chu paihfai turin a hriattir.

Aizawl Mayor Pu Lalrinenga Sailo hovin Emergency Meeting neih zawhah vawiin khan AMC chuan vawiin khan thuchhuah siamin Pi Saiziki,

Republic Vengthlang ram ITI Veng huamchhunga leivung paih chuan Chite Lui a thleng thla an ti a, ti tawp tura order chhuahin Leivung leh Construction & Demolition Waste paihna atana hman tawh loh tur tih an sawi bakah Chite Luia leivung lut chu paihfai turin a neitu hriattirna pek ni se tih a ni a, an enzui zel dawn tih an sawi bawk.

AMC chuan Aizawl khawpui a than chak em avang leh leivung tihchhuah a tam avangin leivung paihna hmun tur a zawng mek a. Local Council zawng zawng hnenah an area chhunga leivung paihna hmun lo zawng tura hriattirna pek a ni a, Tun dinhmunah leivung paihna hmun 7 awm mekin heng leivung paihna hmun te hi AMC chuan uluk zawkin a vil zui dawn a, dan an bawhchhia a nih chuan na takin hma a lak zel dawn bakah Leivung leh bawlhhlawh paih ruk thinna hmunah CCTV dah turin AMC leh Aizawl Smart City Ltd. ten ruahmanna an siam mek a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puang a ni a. AIR News Aizawl Youtube Channel, All India Radio News Aizawl Facebook page leh newsonair.gov.in-ah te, chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

AKASHVANI THANKSGIVING & ADVANCE CHRISTMAS

Akashvani Aizawl Director leh Mizoram Cluster Head Pu DR Lalropuia'n Akashvani Aizawl ah Visual Radio System bun thuai tum ani a ti a, kum 2025 atanga kum 2026 inkarah peih fel hman tura ruahman ani a ti.

Vawiina Akashvani Aizawl in Tuikhuahtlanga Akashvani Multipurpose Hall ah Thanksgiving cum Advance Christmas an hmanna ah he thu hi sawiin Pu DR Lalropuia chuan Visual Radio System bun turin kawng hrang hranga hmalak ani a ti a, studio ti changtlung zual tur leh camera bakah khawl tam tak ken tel a neih dawn avangin tih changtlun ngai tam tak a awm a ti a, hemi atana senso tur cheng nuai 19.55 chu pawm fel tawh ani tih sawiin kum thar 2025 – 2026 inkarah peih fel tura ruahman ani tih a sawi.

He huna khuallian Pu DR Lalropuia chuan Akashvani Aizawl hmasawna hrang hrang tarlangin E-Office chu Hmarchhak stations zinga hmang hmasa ber pawl anni tih sawiin hmasawna tam tak a awm a ti a, thawktuten an thil tum ber mipuite hrilhhriat, zirtir leh ngaihthlak tur tha chhawp chhuah kawngah tan la thar tura chahin tunlai thiamna hman thiam kawngah tan la thar turin a chah a, sawrkar laipui hmalakna hrang hrang puanchhuah kawngah Akashvani Aizawl chuan a thawh hlawk hle a ti bawk.

Vawiina Thanksgiving cum Advance Christmas hun hmanah hian Director bakah Programme Assistant Director Pu Biakchungnunga leh Pu Samuel Z. Hrangate thusawi bakah Staff Welfare Association President Pu Lawmliana Tochhawng thusawi ngaihthlak a ni a, zai leh lam bakah intihlimna hrang hranga hun hman a ni bawk.

<><><>

PRISON BREAK

Tukin khawvar hma zing dar 2 vel khan Champhai District Jail a tang mek hmeichhe pahnih chu an tlanchhuak a, Champhai Police Station-ah thubuai ziah luh nghal niin Police leh Jail-a thawkten an zawng nghal a, chanchin buatsaih lai thleng hian hmuh an ni lo.

Champhai District Jail Superintendent Pu Lalmuanpuia hnen atanga thudawn danin Champhai District Jail atanga tlanchhuak te hi Suinunfeli, Kum 36 Tahan C-Group Myanmar leh Lalchhanmawii, Kum 44, Khawmawi, Myanmar te an ni a, Jail bang hungna rangva tichhiain an tlanchhuak nia hriat a ni.

Suinunfeli leh Lalchhanmawii te hi Heroin No.4 kaihnawiiha man te an ni a, an thubuai hi chinfel a la ni lo ve ve a. Lalchhanmawii hi Kum 2023 November ni 30 khan Central Womens Jail atangin a tlanchhuak tawh a, hun engemaw chen hnuah Champhai Police ten kumin May ni 11 khan manin Champhai District Jail ah an khung leh ta a ni.

Champhai District Jail ah hian mi tang 105 awm theihna tura ruahman a nih laiin tunah hian Jail tang mek mipa 109 leh hmeichhia-8 leh naute pakhat nen 9 an awm a. Vengtu, Security Force pawh an indaih lovin duty post awm zinga pakhat chauh luah tlak a ni a, Jail hungna hi RCC a siam tum mek niin kumthar January 2025 ah siam tan theih an in beisei a ni.

<><><>

PARLIAMENT WITNESSES CHAOS OVER HM AMIT SHAH'S REMARKS ON DR B R AMBEDKAR

Vawiina Parliament rorel inkhawm chu nimin lama Union Home Minister Amit Shah-a'n Dr BR Ambedkar-a chanchin a sawi chhuah dan chungchang avangin a mumal thei lo.

Rajya Sabha-a Union Home Minister Amit Shah-a'n Dr BR Ambedkar-a chanchin a sawi dan duh lohna lantirin Parliament hung chhungah eptu member-te an pungkawm a. Eptu party - Congress, DMK, Left, RJD, AAP leh party dang atangin lungawi lohna lantir hi an zawm a. An zingah hian Congress hruaitu hlun Rahul Gandhi leh Mallikarjun Kharge te, DMK MP TR Balu leh RJD atangin Manoj Jha-te pawh an tel a ni.

Hetihlai hian, Union Minister Giriraj Singh chuan Congress zawk hian Dr Ambedkar-a chu an tihmingchhia a ni a ti a. Parliament pawna chanchinbu miten an kawmnaah Giriraj Singh chuan, Prime Minister hmasa ber Jawahar Lal Nehru-a vang khan Dr Ambedkar-a kha khatih laia Union Cabinet atang khan lo bang daih tur a ni zawk a ni a ti.

<><><>